



NOSEW SËÑ MUSAA KA : JOOYI WOLOF

Ngir bokk ci mbootaayug WAX (Wolof Ak Xamle) jokkool ci limat yii 76 317 83

17 / 78 426 61 25.

Xët 1

Déglul ma jooy jooyi wolof

Mbër ma defar réewi wolof

Ba koo fu seeru am i yëf

Te wootewul fetali sox

Moo naka mbir yéen ñi di mbër

Ku mel ni man moo lu ca war

Gumba gu ndaw gu matla fer

Ndayam ne mes lu ngeen ca wax

Te amagul ku ko wommat

Te xamagul yoon wu jub it

Te manta daw ba raw lor it

Te xel ma dof nopp ya tëx

**Xol bay xalam di fér-féri
Ronqoñ ya yol di car-cari
Cër ya ca des di bér-béri
Di jéem a jëf te ruu ga lax**

**Bis bu xëyee dëgmu di jooy
Mbaa muy yërëmtalu ba yooy
Soo ko jisee gët ya di xuuy
Mbaa muy palamtu lu mu sex**

**Jamono jaa ngi wéet a wéet
Ku deeti jiitu te du njiit
Njeb ruu yi boole seeni boot
Te mel ni géej du fer du nëx**

Mbindéef yi yépp a ngi gëlëm

Dénd bi bépp a ngi lëndëm

Baatin bi lépp a ngii ñu lëm

Saahir si lépp a ngi ne jalax

Wàlliw yi yépp a ngi ne selaw

Ndàmb yi yépp a ngi gelaw

Boroom dogal ba day nelaw

Te àtte yaa nga mu walax

Àllarba jam fi ne bëret

Di nittu fan ciw tamxarit

La àtte yépp ne xëret

Góor ñeek jigéen ñi daw ba xëx

**Xel yépp génn ne wëret
Nawug ku nekk ne gëret
Neexoon keroog ma ne xoret
Ndax YÀLLA dootuma torox**

**Demam ga ump na mbindéef
Te wub na boppub kuy mbindéef
Ku dul malaaka ya ko wuuf
Ak YÀLLA ak ña mu ko wax**

**Yonnen ba ak ahlu badar
Yori biram di ko defar
Moo tax xameesu ca lu wér
Demiinu Yonnen la ko jox**

**La dale Njurbel ba këram
Malaaka sàppe ne gorom
Di ko bijjanti di gërëm
Te di ko sàbbaal di ko jox
Way-dee ña jokku woon ca moom
Te nekk barsàq ne xiim
Ku ne di teeru naa Boroom
Xéewal yi ñëw mu di nu jox
Wàmmeeli Tuubaa di damu
Mu topp leen di leen rammu
Bir ya aka rëy ba faf lëmu
Ba ku ca xam lëf du ko wax**

**Garabi Tuubaa di sikar
Suufam ya ak ndox yi di ser
Saahir si lépp def naqar
Baatin bi lépp ne fayax**

**Jumaahi Njurbel moom di jooy
Taax ya ne yàññ def mbooy
Cëy àddina aka man a njuuy!
Te man a wor te man a nax**

**Tubaab ya sax tëj seeni taax
Ken xamatul lu doon sa baax
Baykat ya gedd seeni paax
Wata ya fenqoo ne rajax**

**Kenn xamatul kuy sëriñam
Kenn xamatul kuy taalubeem
Góor dootu faale waa kërëm
Loo sex mu mel ni ab xetax**

**Luy doomi Aadama a ngi jooy
Jinne ya jébbalu di jooy
Sunnas Yonnen ba sax di jooy
Lislaam ji rët ba far di lox**

**Malaaka yaa ngi wër di jooy
Suuf yi juroom jaar a ngi jooy
Te asamaaw yépp a ngi jooy
Ngir xamaguñ fu waa ja dox**

Weer yi fukk ak jaar a ngi jooy

Bis yi juróom jaar a ngi jooy

Cër yi juróom jaar a ngi jooy

Ba ahlu badrin ñile sax

Juroomi julli yaa ngi jooy

Way-wuutuhante yaa ngi jooy

Jant bi ak weer wi di jooy

Saa yépp yépp a ngi forox

Baahima yépp a ngi ne gorom

Ñax mi saxoon sax ne ñayam

Gàncax gi ànd ne kayam

Garab yi yenn xob yi lax

**Gone di goy-goylu di jooy
Mag di xalam mbiram ba yooy
Ñi mel ni man di wax ne wóoy
Seen bir yi dootul mat a wax**

**Jigéen ñi rët bay fëlëmu
Murit ya dof bay kayamu
Ñële di yuuxuy bëlëmu
Kuy jéem a jóg far ne sërëx**

**Ku ne bëret far ne nërëm
Njénde yi yépp ne xerem
Jirim bu nekk tēj kërëm
Ñële di rëb-rëbi di lox**

Boo xalamee Ngën ji mbindeef

Bisam ba ndax nu man a giif

Ak xulafaa-u ya ko wuuf

Te xam ne àddina du sax

Kerog ba Yonnen nee meles

Sahaaba yépp ne taxas

Abaabakar Saddiix a des

Wa maa Muhammadun la wax

Te dafa gëm ba xol ba sooy

Te teewu koo muuru di jooy

Ba xel ma désee la ne suuy

Ku dul ka bindoon du fi sax

Ku ne ne ngéej a dee keroog

Ku nekk fàtte say baraag

Ruu yépp faatu nan keroog

Sun jëmm yee fi des di dox

Jii waay a wuutu jooja waay

Yii gaa ya wuutu yooya gaay

Mii mbir a wuutu mooma, waay!

Mii mbir a rëy ba weesu wax

Déglul ma lim fi ay ndamam

Yoo xam ne ken dootu ko am

Li des ci dunyaa ci kanam

Ndox soo fu teeyal it mu nëx

**Moojaa ku deeti feeñ a feeñ
Ba Màkka ñëw fi di ko jiiñ
Yonnen ba, gannaar di ko téen
Mu far di leen jox i sarax**

**Ñoo di ko jox ay àddiya
Ñii di tawatsi àddina
Ñii mbiri àllaaxira ya
Ñoo bañ a wuysi def i tëx**

**Sëriif yi ñëw fi di ko yéem
Làbbe yi ñëw fi di ci jéem
Ku ne di barkeelu ci moom
Mu fees a fees ba mel ni dex**

**Muy jàpp ceddoy def i seex
Di fomp xol ya ba ñu weex
Génnee ca àddina ak baneex
Saytaane ak bakkan mi tax**

**Moojaa ku deeti jëf lu jar
Yonnen ba ak ahlu badar
Ngeen jaxasoo ci yépp bir
Ba foo fi jëm ñu di la rax**

**Aras di jaayu cim mbindam
Malaaka sàbbaal ngir mbindam
Ibliis di làqu ci'g lëndëm
Limub araf ya di melax**

Muy dox ci jàww ni njanaaw

Di xotti déeley asamaaw

Lum wax fa diiwaan ñu ne waaw

Muy fal di folli ci lu sax

Di soppi ruu ya di defar

Di jàpp ñaawtéef ya di far

Di yokk dig ya ba mu sar

Di gàddu tiis ya gën a wex

Moojaa ku deeti xamle weer

Ci bis bu niis bu bañ a leer

Ci gàmму mbaa ci weeru koor

Ba sunu xol yi bañ a nëx

Moojaa ku deeti feg balaa

Tey xamle waxtu wa balaa

Di ñëw ci nit ñi ba balaa

Agsi mu sàkkluuy sarax

Di feg i mbas di feg i tiis

Ak mbir mu xew tey yan bu diis

Mbaa xiif bu tax ku ne di siis

Ba boo tibbee doo tal a jax

Moojaa ku deeti doy a doy

Bay fàtteloo baay ak i nday

Ku ne mu jox la lu la doy

Te soxlawoohul ku ko jox

Boo ko joxee da na la jox

Boo ko joxul mu di la jox

Te du la jànni du la ñax

Te du la wor te du la nax

Boo ko moyee mu di la may

Boo koy jëfal mu di la fay

Boo ko bañee mu di la jay

Ba xëy la not nga ne sërëx

Boo ko meree du la mere

Boo ko soree du la sori

Boo gorewul moom mu gore

Kii ku ko bañ da nga torox

**Moojaa ku deeti fab i koom
Di buub di sànni niki dóom
Di fab jirim yay def i doom
Ba ken du faale nday ya sax**

**Di fab i téerey def i koom
Du faale junneek i gëléem
Ku ñëw mu jox la ba nga luum
Kuy dem di ñëw ak ku fu sax**

**Di tagg far Ngën ji Mbindeef
Te faalewul yàpp wu duuf
Ba faf yaram wa dafa loof
Te xeeti ñam ya ne pacax**

**Di dugg i xalwa ciy kërëm
Yonnen ba jox ko fay ngërëm
Te boo ko dee woo ay dërëm
Du tax mu déglu la nga wax**

**Moojaa ku deeti wax i bóot
Di sulli ay xam-xam yu xóot
Ba sunu xol yi dootu root**

Ca dab ya ibliis def i ndox

**Moojaa ku deeti wax muriit
Lu koy fegal pexey mariit
Di soppi dof mbaate baliit
Muy cam su yewwu te forox**

**Kuy saafaraati ràggi xol
Ku deeti far tilimi xol
Ku deeti xoolee gëti xol
Bay jis lu ken dul man a wax**

**Ku deeti dundal guddi yi
Bëccëg yi yépp ak waxtu yi
Bedd yi yépp ak bunt yi
Foo toll jis mu di fa dox**

**Fu ne mu def fab jullikaay
Ku ne mu boole la ak i gaay
Digal la teg la cib jataay
Te du la wor te du la nax**

**Di jiite waxtu yiy juroom
Du wuute mukk te du tiim
Xasaa-idam sëf nay gëléem
Ajaa-ibam sëf nay warax**

**Di bind guddi du nelaw
Bu jëmm yépp nee selaw
Mu dem ci péey bu ne xeraw
Bu bët setee mu di nu wax**

**Kii ku ko jis sax ku ko jis
Ku jis ku jis waa ju ko jis
Su ngéen demee ca boo ba bis
Mu rammu leen ken du torox**

**Doomam ya ëpp nañ sëriñ
Seexam ya doy na ñuy sëriñ
Ay taalubeem raw nañ sëriñ
Kuy roy na roy ci lii ma wax**

**Moojaa ku deeti tarbiya
Ba noppi daa di tarxiya
Ba noppi daa di tasfiya
Ba kum gërëm dootu torox**

**Moojaa ku deeti taxliya
Ba noppi daa di tahliya
Ba noppi daa di taxliya
Ba ku ko jis daal di ne ax**

Ku deeti xamle tasawuf
Te bis bu ñew muy gën a saf
Ba gaa ña delluy saf i dof
Garab yu ndaw yiy doog a sax
Ndax ngër mi dellu yees a yees
Ndax YÀLLA am ca gaa yu fees
Mbaa gaa yu sóobu ba ne suus
Ca péeyi góor ña di ca wax

Wuy ma ne wuy man ki ma ron
Te ndox mi yol fi sa ma ron
Lu nekk maa ngi ko naroon
Fu may duyeeti ngën gi ndox

**Wuy yoonu tarbiyaa ngi jooy
Ngéram mi def ñall ak i mbooy
Cëy àddina aka man a njuuy!**

Te man a wor te man a nax

**Tarbiya yaw def ngab jirim
Ñàkk nga waa ju saf xorom
Nun ñépp noo ngi ne gorom
Ni jën yu ndaw yu ñàkk dex**

**Soo doon jigéen ma ne la tay
Muurul bu jag dootul a sëy
Far yi fi des duñu la doy
Luñ jaayu jaayu duñ la nax**

**Déglul ma jooye alxuraan
Waayam ju mat ja ba rañaan
Da koo defoon ab kerkeeraan
Di dem di délsi di nu wax**

**Ca lay jiseek Ngën gi Mbindéef
Moo di kënoom bay noti seef
Gaalam ga mooy jàlle mbindeef
Ca bis ba kenn dul tal a sex**

**Moo ku la deeti def ci taax
Di sotti lajkoloñ ju baax
Boole la teg ci lal yu baax
Te dem fanaan ci néegu ñax**

**Mo ku la deeti jëndlu
Mo ku la deeti jànglu
Mo ku la deeti bindlu
Bu ñuy nelaw mu di la wax**

**Ku deeti jàpp ay junneem
Di def ci yaw mbaatey géléem
Te def ma koomam jamonoom
Ku ko fu xam na ma ko wax**

**Ku deeti fab lim ub kurus
Ci xeeti xaalis ak wurus
Di sànni gaa ya koy durus
Te di ca raaxaley tarax**

**Ku fabatiy laaya di nas
Araf ya takkoo ni kurus
Saahir sa mel ni kuy durus
Baatin ba mel nikib tabax
Moojaa ku deeti listixaar
Ci alxuraan di tuddisaar
Di tuddi laaya di xiyaar
Ba ne la lii la YÀLLA wax
Mushaf ya lay wéetalikoo
Durus ga lay fàggandikoo
Taalif ya lay jottalikoo
Leer ya gëndoo mel nig melax**

Mbaakol di bind di ko yót
Gànnar di bind di ko yót
Saalum di bind di ko yót
Muy jënd ay móol di ca rax

Boo féetewoo di ko bindal
Mu féetewoo di la dundal
Boo koy bayal di ko bindal
Mu sàkk ñuy bay di la jox

Di la defal can ub jigéen
Labat ko yët la doo ko miin
Te gàddu say bir nga ne tóon
Mbaa nga ne gumm nim petax

Su ma yëgoon jënd i mushaf

Su ma yëgoon bind i mushaf

Su ma yëgoon dëju ba xëf

Su ma yëgoon matul a wax

Su ma yëgoon di ko bayal

Di ko bindal di ko demal

Di ko sukkal di ko dawal

Te di ko rootal dabi ndox

Muusaa Ka seetal say moroom

Te kon nga sant sa BOROOM

Seetal ñi weddi jamonoom

Ak ñi wéy ak ñiy bëgg a wax

**YÀLLA laram bu mu gërëm
Loo ko jëfal am ca ngërëm
Soo ko joxee benn ub dërëm
Mu ful ko ay junni yu sax**

**Leeram yi tax lay am i yëf
Di way araab di way wolof
Te xam ne jàngóo sax u lef
Mbóotam mi rekk a la ko jox**

**Leeram gi tax laa am i gaay
Te donnewóo ko ci sa baay
Fekkóo ko woon ci say najaay
Ku seetlu rus ba ne tesax**

Te xamalóo leen i masal

Te firiloo leen i fasal

Te bu ñu sukkee duñ desal

Lii sopp Bàmba rekk a tax

Te dunḡñu xàcc duñu mer

Te duñu xàddi du ñu bar

Te duñu yoqi wut i kër

Te du ñu fecci la ñu wax

Sëqal i bopp ne suxur

Di fande tey soli sagar

Nga tëdd ñuy defar sa kër

Loo digle ken du ca nasax

Waajal te jëm ci sa BOROOM

Te jéem a sàmm sa juróom

Yaar yii ñu boole ñu ne xiim

Te xam ne bis da na ñu wax

Ngir ki la daa sàmmal di feg

Di la tinook ki lay alag

Bu sàmmatul tay ak ëllëg

Boo farluwul danga torox

Alhamdulil laahi na ngeen

Sant BOROOM Aras mi leen

Tàbbal ci ngéram mi te ngeen

Jis ko mu jis leen ngéen di wax

Ngir bokk ci mbootaayug WAX (Wolof Ak Xamle) jokkool ci limat yii 76 317 83

17 / 78 426 61 25.

Xët 32

**Alhamdulil laahi ndegam
Tuubaa di Màkkay aji-gëm
Ku yéene aj te manla dem
Na fas siyaareji te dox**

**Ku xam te xàmme jamonoom
Na xam ne YÀLLA ki nu moom
Moo boole penku ak soowoom
Te yori bóotam di warax**

**Alhamdulil laahi na ngéen
Sant ki tax mu jege leen
Dogal ba jiitusi na leen
Dogal ba rekk a nu ko jox**

Manoon nanoo dëkk ca Ngaay

Walla ca Podoor ak i Gaay

Walla nu faf dëkki fa Xaay

Di xëy di gont di ko dox

Manoon na koo defi Gabon

Nuy fay i paas di yor i bon

Walla mu dem ba ne nu men

Ba ken du xam réew ma mu sax

YÀLLA bu sun réew yi di naaw

Di wuyu YÀLLA niy njanaaw

Yal nanu dal fi sa gannaaw

Nga boole leen far ne tarax

**Yal nan ñu rob fa sa gannaaw
Kurél ba ngay bokkali géew
Te may nu mbég mu gën a gaaw
Xefiinu bët mbaateg melax**

**Àllaahumma salli alaa
Sëydinaa baabil hulaa
Bi haqi haaidil malaa
Yërëm nu boole nu sarax**